

INUIT ATAQATIGIIT INATSISARTUNI



Januar 2023

UPA2023/67

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Innuttaasut, suliaqartut/immikkut ilisimasallit, namminersorlutik inuussutissarsiortut, kommunit Inatsisartunilu partiit imigassamik akiuniarnermi ataatsimut periusissialiornermi akuliunneqarlutik, ukiunut arlalinnut atuuttussamik ilisimatuussutsikkut uppernarsakkanik toqqammaveqartumik imigassamut politikissamut toqqammavissamut suliakkiummik Naalackersuisut peqquneqarnissaannik Inatsisartut aalajangiiffigisassaattut siunnersuut. Periusissiaq atuutilersitsinermi aningaasatigut allaffissornermilu kinguneqaatissanut naatsorsukkanik imaqassaaq, UPA2025-milu agguanneqassalluni.

(Inatsisartunut ilaasortaq Agathe Fontain, Inuit Ataqatigiit)

Tungavilersuut:

Nunatsinni imigassamik ajornartorsiuteqarnerput annertummat, kingunipiloqalunilu assortuussutaasinnaangilaq.

Siunertaraarput naalagaaffingornissaq, Nuna nukittuunik inuttalik pisariaqartipparput, taammaamat ullumikkut ajornartorsiutitta minnerpaaffissaannut killinniarluta sulisariaqarpugut. Assaat tamaasa pisariaqartippagut, ullumikkut aamma siunissami.

Naalackersuisut 2015-mi nalunaarussiaq saqqummiuppaat: *"Kalaallit Nunaanni imigassartornermut aningaasartuutit"*¹. Tassani takusinnaavarput toqqaannartumik Peqqinnissaqarfimmut 212.5 mio koruunit, isumaginninnermut 83 mio. koruunit, tunisassiaqanngitsoornermut 153 mio. koruunit, pinerlunnernut 80 mio. koruunit ukiumut aningaasartuutigisarigut. 2015-mi akiusut malillugit ukiumut ataatsimut katillugit 337 mio.kr. toqqaannartumik imigassamut aningaasartortarpugut.

¹ [Atornerluinermit aningaasartuutit \(peqqik.gl\)](http://peqqik.gl)

Puigornagit toqqaannangitsut ilanngukkaanni, eqqoriarsinnaavarput minnerpaamik marloriaatingortissallugit, toqqaannangitsumik peqqutit ilanngukkaani.

Toqqaannartumik eqqortakkatta ilaat eqqaalaaanni; imigassamik anaanaasoq atornerluinerani, naartuut atornerlueqataalluni inunngortartut, meeqqat angerlarsimaffiup avataanut inissattat, uffa angajoqqaat angerlarsimaffimmini ilagiinnarusukkaluaraat, qanorlu kinguneqarnerluisartigisut, kinguaassiutitigut atornerlunneqartut, atornerluisoq imigassartornerup kingorna imminut aqussinnaanngimmat, tamassumalu inuunerup sinneranut kingunerluttartoq, sulingitsoorneq peqqutaalluni suliffeqarfiit sulisussaaleqisut, soorlu utoqqaat illuiniittut isumaginissaaruttut. Peqqinnissaqarfimmi sulisut ulapereersut, imigassartorsimanerup kinguneranik ajutoortut passuttariaqartarneri ilaalu ilanngullugit.

Maani inimi issiasugut, taakkuuvugut Inatsisitigut iluuseqarsinnaasut, iliuuseqarneq allanut tunniussinnaanngisarput.

Qulaani eqqartukkakka eqqarsaatigalugit, iliuuseqanginneq pineqartunut peqqusiileqinaannarpoq.

Pinaveersaartitsineq aqquataavoq. Nunarsuaq tamakkerlugu ilisimatusartuarput, ilisimatusarnermilu uppernarsineqartuarpoq, qanoq iliorluta pinaveersaartitsineq sunniuteqarnerpaaq aalajangiifigisinnaagipput.

Siunissamut iliuuseqarnissatsinnut oqaloqatigiita, pinaveersaartitsinermik ilisimasallit saqqummiillik, isumaqatigiittalu partiit akimorluta, ukiunut amerlasuunut isumaqatigiissuteqarluta, tamatta inooqataaffigisinnaasatsinnik.

Iliuuseqarnissatsinnut paasisimasanik, ilisimatusarnikkut akuerisaasunik tunngavissagissaaqqulluta isumalioqatigiissitamik pilersitsisoqarnissaa siunnersuutigaara, taamaasilluni ilisimatusartut ilisimatuullu imigassaq pillugu ilisimasaminnik inuiaqatigiinnut siammaasinnaalersillugit suliarthillu naammassigunikku qanoq iliorluni imigassamik atueriaasitsigut ajornartorsiuteqarnerput millisarniarlugu iliuuseqarsinnaanitsinnut innersuuussutinik suliaqartitsilluta.

Nunarput imigassaq pillugu ataatsimoorussamik qiningaaffiit arlalinnut atuuttussamik periusissamik pisariaqartitsivoq, inuiattut ajornartorsiutigisarput qinersinikkut aaqqinneqarsinnaanngilaq politikikkulli sullarissusermik iliuuseqarsinnaassuseqarnikkut ilaatigut aaqqiivigineqarsinnaalluni.

Ataatsimoorussamik imigassaq pillugu periusissiornermi nunatsinni piffinni najugaqarfiit iliuseqartuunissaat avaqqunneqarsinnaanngilaq, inuit najugaqarfimmini peqataallutillu akuutinneqassapput. Kissaatigaara periusissioreernerup kingorna periusissiap piviusunngortinnissaanut aningaasaliisoqarumaartoq taamaattumillu aningaasatigut allaffissornikkullu kingunissai ilanngullugit qulaajaasoqassasoq isumaqarpunga. Qulaajaanermittaaq kommuunit qanoq suleqatigineqassanerat aamma ilanngunneqassasoq kissaatigalugu.

Imigassamik ajornartorsiuteqarnerput iluuseqarfigisigu, ataatsimoorluta, siunissaq pillugu, meeqqat inunngortussat pillugit, nunap inui pillugit.

Neriuppunga siunnersuut tigulluarneqarunaartoq.

Pisortanut aningaasatigut allaffissornikkullu kingunerisassai:

Naalackersuisunit akuerineqartussamik suliaqarnermi allaffissornikkut isumalluutit ataatsimut atorneqartut A/C fuldmægtigip ukioq kaajallallugu sulineratut aningaasartuutaanissaat naatsorsuutigineqassaaq, tassa 500.000 koruunit.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.